

南
潯
鎮
志

河渠

汪曰楨撰

南潯鎮志三

潯溪

宋談鑰吳興志云潯溪在烏程縣東七十二里有

水自德清嘉興來與震澤罍脰湖接焉明一統志云潯

溪自運河東流與震澤鶯脰湖相接今德清諸水自南

來運河自西來北入太湖東入鶯脰湖然則運河及南

北市河皆古之潯溪也

按沈登瀛備志云祇園寺莊田記云有溪曰潯在潯之北有寺

日祇園然則潯溪卽今之運河也文莫古於是當從之若以嘗三申圩之帶水當之毋乃與茗雷諸溪不類乎

明吳國倫行經潯溪奉懷尚書學士董用均先生楚

客蒲帆震澤來南潯甲第錦雲開懸輿萬木尙書里

載筆千秋太史才臥穩客星成水石丹還紫氣結蓬

萊經過不淺追趨意病骨龍鍾倘見猜

明余津潯溪漁唱二首溶溶流水曲溪晴兩岸桃花
溪上生楊柳拂頭推不去黃鸝連叫兩三聲○蔡蕩
天孤碧四垂雨晴正好放鷗鷺沿河十里錦雲爛紅
藕花香拂面吹

明葛一龍潯溪對雨市斷溪聲遠橋迴野色荒吹來
數點雨相送一孤航漲綠平官渡烟黃拂女桑隔花
僧共語東去是錢塘

董志林曉發潯溪將至茗城蕭寺疎鐘霜外傳荻花
楓葉散平川雲連野色人迷渡風送秋聲獨放船樹

裏漁莊聞曉汲橋邊蟹舍見炊煙忽聞采采菱歌起
徐孺山頭酒旆懸

董燠潯水秋漁曲南江秋來三尺深

水經注南江支分歷烏程縣南

通餘杭縣與浙江合

了了游魚躍碧潯懶頭船子浮湖去一髮

遙山欵乃音○潯南潯北楓欲稀杪秋遙夜來漁磯
澄潭列火挺叉入月落烏嘒船始歸

又吳船曲

南江東下曲于巴茗雪西來襟帶斜一樹

姊歸三月暮疾風吹雨漲桃花○春事愁中與病中
碧潯溜雨一村風宋元名剎麻姑字咫尺輸他折屐
雄

范鍇潯溪紀事詩佚志殘碑尚可稽當時沿革未全
迷菰城古邑三唐後誰識南林舊有溪○鎮戍監官
古制存萬家烟火聚雲屯太湖水利關民政安定齋
空孰講論○十里桑陰水市通家家門外白蘋風五
湖狂叟西村客愛作潯溪老寓公

運河 卽東西二柵市河每歲漕艘必由於此其源有二
一自峴山漾分流至定安門外繞城而東一自城內雪
溪分流至駱駝橋南過望州橋出迎春門俱達二里橋
合爲一河東流六十里至東遷村自東遷而東其南岸
支港爲白米塘挑水灣北岸支港爲十里橋九里橋六

里橋等港南北交綜分合不一又東至三里橋支流北
出爲三里橋港運河又東過西東二壩口入南潯鎮西
柵爲西市河過營汛前祇園寺前支流南出爲西倉港
北出爲永安橋港又東經垂虹橋東南流過米廊下紀
家壩港西南來注之又東與南北市河交錯爲十字港
又東爲東市河經通津橋過董宗伯第前通判署前南分
船場皇御河南來注之南分又東經洪濟橋百間樓港
浜北來注之又東馬家港南來注之又東過東總管堂前
出東柵南分三又東過極樂庵前出分水墩爲東塔灣
過撞塘壩口入震澤縣界又東曹村西港南來注之又

東曹村中港南來注之

南市河東出支水東北流而仍注于運河者至此盡矣。○按水道源流並據里人紀南枝

所著潯溪水道攷後仿此

自此而東至半路亭其間南

岸支港則有曹村東港盛家壩港外堠港北岸支港則

有駟馬橋港曹村北港亦南北交綜分合不一又東至

安慶橋支流南出經應天寺嚴墓市入嘉興府秀水縣

界運河又東至震澤鎮又東過雙楊梅堰至平望鎮入

鶯脰湖與嘉興南來運河會東柵外自分水墩至平望

凡塘南北諸漾蕩支河皆泄水歸東要道雖地屬江南

其通塞皆關湖州水利唐元和中荻塘河水滯淤逼塞

不能負舟刺史薛戎濬之百餘里

董志范志並云運河時或旱涸鎮民間濬

按此自民間私事若漕艘擱淺開濬運河事固屬官不屬民也乃載入志中幾疑民濬爲定例矣慮貽將來爲役之擾故特辨之

曹仁虎潯溪竹枝詞雁渚鷗沙足水痕陰陰桑柘接曹村西來一夜茗溪漲碧玉春流直到門

董蠡舟潯溪棹歌運河橫貫市心中南北支流屈曲通畫舫千家夾明鏡石梁三道臥晴虹

董恂潯溪棹歌于嶼塘長遠岫青西天目水此由經桃花三月春波暖綠過江南半邏亭

西倉港 運河南岸第一支港分西市河水南流入沐鳳

橋西分沐風兜又南經鳴鳳橋又南出壩橋入紀家壩港

紀家壩港 運河南岸第二支港上承鰲里褚家埭談家

灣二港西來之水東流至補船村與平橋港南來之水

相會北流至小圩西南分爲二直北而轉東者爲小圩

後港轉東者爲小圩前港

東分南兜

前港轉北與後港合支

流東出爲石溪又北轉東爲享亭灣過西莊村經鍾家

橋與石溪水合爲紀家壩港又東西倉港北來注之支

流東出爲城壕紀家壩港又東經楊家橋

南分白鵬兜

迤北

經天到橋

北分鳳凰池

東北流出豐年橋入西市河

石溪 分小圩西南來水東流經化人橋至紀氏祖墳前

爲仙液潭又東經秀水橋轉北入紀家壩港

皇御河 運河南岸第四支港按第三支港卽南市河別見後一名御河

一作王御河本名黃泥河分薛家漾水北流東分蓮溪西分小兜

經暖橋又北出醬園橋入東市河按俗說宋高宗至此故名舊志已知其妄

不載是說然仍入之古蹟未當也本作黃泥爲是或云當爲惶五河其東岸卽惶五圩猶北柵外之拜五巷稽

五漾南柵外之簡五塘也說亦可通

范鍇潯溪紀事詩鐘敲野寺留神馬春到梅林說異

蛇贏得居人長歎息御河愁照月痕斜勞鉞府志建炎二年高宗

南渡至潯懼追者見匿嘉應神祠中月下俄見泥馬忽動跨之而行遂入杭州帝舊封康王今褒能寺俗

呼康王寺以帝經過名也湧幢小品鎮西北可十五里曰梅林中有大梅樹一株可設三十筵宋高宗過

潯讌其下因稱曰上林方到菴有一巨蛇衝水昂首而至眾魚尾之以爲常若有意者高宗舉筆題其

首作小畫泣下懷之而去至鎮南五里古寺宿焉今有康王橋橋之西爲康王寺廢已久矣一老儒每言鎮之大橋下常有巨蛇橫亙如木舟礙不得行又居人數達于路兩眼如燈火見頂上有康王二字又或蟠于市樓上第不傷人人旣數見亦不爲異蓋其時人烟尚稀最初高宗過之乃一荒落見草菴景致不覺留連今聚且萬家人物日盛蛇亦非容身之所老者死幼者不及間離人口角且五六十天下大矣何所不有姑記之亦淳鎮一異事也研北居瑣錄史載高宗南渡建炎三年二月帝至鎮江宿于府治翌日召從臣問去留是夕發鎮江越四日次平江又二日次崇德遂如杭州攷此則過南潯之說謬矣勞志褒能寺與嘉應祠旣潤而爲一旦嘉應祠咸淳六年敕建建炎二年烏得見此廟額又聞諸父老曰皇御河舊名黃泥河因有高宗南渡過潯之說遂相沿傳會云異蛇神馬傳說紛紛不足信也

墨溪

運河南岸第五支港今名馬家港上承薛家漾水

南流轉東出長生橋轉北爲墨溪范莊灣港東南來注

之又北經明德橋

東分南小兒

過朱少師第前

東分北小兒

又北

出馬家橋入東市河

按墨溪之名明時已有之范志云康熙間張肩畫竹洗硯於此故名

也非

張鑑潯溪棹歌

蠓殼紅窗水閣邊
墨溪初漲碧于煙

杏花衫子鶯翎扇
倚檻閒呼茉莉船

墨溪即馬家港盛夏多集花船

董斯張詩水樓處處凭紅袖吳下新來茉莉船是也

三里橋港

運河北岸第一支港

按運河西來支港甚多今取距鎮最近者為始

分運河水北流入三里橋又北過裘莊方氏祖墳前與

塘田圩港西來之水相會又北經眾安橋分流向北者

為方家港轉東者為福積港

永安橋港

運河北岸第二支港分西市河水北流入西

弔橋又北經小弔橋

西分妙境庵兜

又北出永安橋與嘗三圩

西港接

西分琵琶兜卽白果潭

合流東出爲西木行港入北市河

百間樓港

運河北岸第四支港

按第三支港卽北市河別見後

分北市

河水自北十字港東流入蓮界橋又東迤南經長板橋

又南後河西來注之

東分洗粉兜

又南出東弔橋入東市河

北市河東出支水東南流而仍注于運河者至此盡矣

〔方熊〕蕩溪竹枝詞參差闌闌壓溪流長板橋連洗粉

兜夾岸珠簾風宕漾春波影泛百間樓

簡五塘港

卽南市河之上流一作甲午塘港上承馬要

塘西南來水東北流過池亭漾合神墩塘南來之水迤
北而東爲七里塘迤北至大洪村經丁家橋轉東經康
王寺橋分流向東南者由四方蕩入沈張漾向北者爲

簡五塘港紀南枝曰舊志皆稱烏鎮北息塘之水北流
至穿珠灣由大洪村康王寺橋入簡五塘因

穿珠灣在大洪村東南北近故也實則簡五塘所受皆
屬幹河之東北流至烏鎮之北流不獨不能由穿珠灣
西北流入大洪村抑且分七里塘之水由穿珠灣東
南流同入沈張漾水性惟順是適可目驗而知也簡

五塘港北流與蔡蕩自豐橋西來水會西分豆腐兜又
分高基兜又分

許家兜東分硬漲橋港通划船漾又
分閔塘兜一作閔堂兜又分華家兜又北與南市河接

張鑑潯溪棹歌霜花曉撲漉魚籃白韭紅薑食譜譜

簡五寒塘秋水闊漁娃處處喚螺蚶簡五塘多
集漁艇

沈金渠甲午塘今是庚寅日來過甲午塘荒城尋太尉野廟拜康王艇小瓜皮泛村深竹影藏陰晴天氣半節候已梅黃

南市河 上承簡五塘港北流入南柵爲南市河支流東出爲白鸞港市河又北蘇露港西來注之又北支流東出爲虹映港市河又北經南新橋支流東出爲竹園港市河又北經南安橋鷓鴣溪自蔣家橋西來注之支流東出爲鳳凰河市河又北經華家橋鷓鴣溪自新開河西來注之又北經興福橋西分寸池潭又北經張王廟橋支流東出爲定心港市河又北與城壕及司前港交錯爲

南十字港又北經便民橋又北出泰安橋至十字港與運河會

蘇露港

南市河西岸第一支港上承箋五圩南北二港

之水其南港上承鳳凰蕩南來之水北流轉東至唐家

匯與蔡蕩南來之水相會而北經麻涇橋

西分長兜

又北為

邵家蕩轉東經洞賓橋轉北為善田灣又北與北港會

其北港上承鯨里方家埭西南來水東流

北分朱家板橋港

為

北水港經北水港橋

北分曹家兜

迤南又東與南港會為蘇

露港

北分羅嫌兜

東流出蘇露橋入南市河

鴈鴣溪

南市河西岸第二支港即蔣家橋港上承鯨里

潘家埭西南來水東流經義塚橋

北分談家灣

至八十畝圩

與朱家板橋南來水會又東

北分平橋港

迤南經斜橋爲鷓

鴝溪又東至豐草庵前折而南流支流東出爲新開河

鷓鴝溪又南經萬古橋

西分祁家兜卽挂瓢池

轉東迤南

西南分麻皮兜

又東出蔣家橋入南市河

姚石春日晚步至鷓鴝溪

不耐市喧雜尋幽到竹林

橋低春水漲徑小麥苗深野鳥投烟樹漁罾曬柳陰

斜陽容小立溪口好閒吟

曹仁虎尋溪竹枝詞

鷓鴝溪水碧漣漪暇日宜教小

艇移有約招提茶話去枯苔手剔宋元碑

張鎮鷓鴣溪春望不定經行路平橋帶斷磯野花臨
水發江鳥破烟飛淨土間相訪遙山晚更微漁舟何
處唱余亦詠而歸

又潯溪漁唱阿儂家住鷓鴣溪不見鷓鴣溪上唳只
有曉寒樓外月夜深還照夢華西

新開河 南市河西岸第三支港明董氏所開分鷓鴣溪
水東流出鷓鴣橋入南市河

董恂潯溪棹歌新開河畔幾人家野徑栽桑復種麻
豐草庵荒已無主爛堆黃葉似袈裟

城壕 南市河西岸第四支港卽西交界壩港分紀家壩

南出之水東南流

東分紀氏南園池

迤東

南分小兜北分徐家漾

出西交

界壩橋至南十字港與南市河會

南市西隅支水流注市河者至此盡矣

元代築城時南面偏西之壕也亦名城隍上

按城四面皆有壕惟

此處城壕之名至今尚存今以地勢攷之城壕轉北通西倉港西南面之壕也司前港自薛家漾通馬家巷東南面之壕也百間樓港東北面之壕也西木行港轉南通永安橋港西北面之壕也因是推之東弔橋西南洪濟橋爲東水門西弔橋東南垂虹橋爲西水門北十字港南柵橋爲北水門南十字港北便民橋爲南水門而中市十字港則爲城心也城之遺跡約畧可知矣

董熄吳船曲不復嘯烏棲女牆長烟冪歷舊城隍斷

橋流水春畦綠閒殺羅敷陌上桑

楊鳳苞城濠覽古廢隍尚見黑雲屯歎息三興破楚

門錢俶錦衣空內屬尉陀左肅漫稱尊白駒北夢舟
中夜黃葉西風水外村當日羣雄總安在野鳥嘯上
女牆昏

白鸞港 南市河東岸第一支港分南市河水東流入百
老橋迤南又東過潘氏祖墳前迤南又東南分南
喜兜分流

向北者爲渡船港向東者爲尤家港

渡船港 白鸞港水北流爲渡船港經渡船橋至袁孝子

墳前東西分流西流者轉北西分紀
家兜至磧沙寺右按此
處木

通流近
已斷東流者轉北與曲江水支流自北來者相合而

東爲懼三圩南港

尤家港

白鸞港水東流爲尤家港

南分泥司兜

經尤家橋

南分

孟家寮

又東懼三圩南港北來注之又東入栗樹港

懼三圩南港

渡船港與曲江水支流合而東流過尤氏

祖墳前轉南入尤家港

栗樹港

烏程震澤東西分界一作力持港南接划船漾

經莊思壩橋北流與尤家港西來水會又北經栗樹廟

橋又北與懼三圩東港水會爲栗樹蕩

一名蕩小

東流入震

澤界爲橫港又東轉北爲水斗注又北轉東爲曹村中

港轉北出樹滋環橋入運河

南市河東出支水止此

虹映港

南市河東岸第二支港分南市河水東流入虹

映橋又東爲黃家蕩

東分虹映兜

轉北出師古橋入竹園港

竹園港

南市河東岸第三支港分南市河水東流入醋

坊橋至張處士墳前與虹映港南來水會繞墳而北

西分

壽慶庵兜

又北東分南林池及孫家兜

至嘉應廟前爲木瓜濠

東分華家兜

鳳凰河西來注之轉東經王家橋爲石澥屈曲而東名

曲江又東至朝眞堂前支流北出爲范莊灣港曲江水

又東支流南出至磧沙寺後與渡船港南來水相會而

東爲懼三圩南港曲江水又東經八卦橋

南分小兜

又東經

秦庵橋又東轉北

東分褚家兜

又北

西分韓家兜

轉東爲玉成灣

北分烏朋兜一作烏盆兜

經朱氏祖墳前又東支流南出爲懼三圩

東港

北分撞塘壩港壩南有麻皮漾

曲江水又東入震澤界又東轉北

爲曹村西港又北出木橋入運河

范莊灣港

分曲江水北流入曲江橋

西分小兒

西北流過范

莊灣入墨溪

懼三圩東港

分玉成灣水南流轉東折而南流又轉東

入栗樹蕩烏程震澤東西分界

鳳凰河

南市河東岸第四支港分南市河水東流入鳳

凰橋迤北又東出毛家橋入木瓜漾

定心港

南市河東岸第五支港分南市河水東流入定

心橋至廣惠宮後南北分流南流經花園橋爲勝義庵

兜北流入司前港

司前港 南市河東岸第六支港卽東交界壩港分南市
河水自南十字港東流入東交界壩橋又東經會際橋
又東定心港南來注之又東爲薛家漾分流向北者爲
皇御河向南者至城隍廟後轉東南分小兜出長生橋轉北
爲壘溪並北入東市河

北市河 分運河水自十字港北流入清風橋爲北市河

又北支流東出爲後河市河又北經太平橋西分唐家兜又

北經鹽店橋又北經柵椿橋與西木行港及百間樓港
交錯爲北十字港又北過北姚家匯潯溪河西來注之

又北經北新橋

東分小兒

至董氏祖墳前彩虹橋港西來注

之支流東出爲下壩港市河又北出北柵與古漚港接

按北市河自北十字港以北卽爲古漚港

古漚港

卽北市河之下流一名鼓樓港北流出北分水

墩

西有李家河自南車駕橋來會又有橫古塘水自北車駕橋來會東分箬帽橋港又分匠人灣又分斜河

並通湖基漾

經北迴橋

東分樓下新橋港又分冉莊港又分姚田芋葉灘

入震澤界

又北達稽五漾或東或北支流歧出由各漚港入太湖

後河

北市河東岸第一支港一名藕湖分北市河水東

流入天帶橋又東

南分愛蓮池小兒

經淨波橋又東迤南爲栲

栲灣經官房橋轉東出聞濤橋入百間樓港

下壩港 北市河東岸第三支港按第二支港即百間樓港已見前 分北

市河水東流南分董墳兜又又東北分金家兜經梅家橋至

新庵前南分地心東兜折而北流轉東入震澤界支流歧出東

入泮溪北入稽五漾

福積港 上承三里橋港南來之水東流過小橋村北分馬家

兜又分東丁家港又東為白漾北分潘家兜又又東經福積橋

南分菜花兜又東北分莫家灣過姚家灘南分戴家兜南北分流北流

為彩虹橋港南流為營三圩西港

營三圩西港 分福積港水南流支流東出為潯溪河營

三圩西港又南東分朱墳兜與永安橋港接合流東出為西

木行港

西木行港 北市河西岸第一支港永安橋港與嘗三圩西港合而東流爲西木行港又東至北十字港與北市河會

潯溪河 北市河西岸第二支港分嘗三圩西港水東流出潯溪橋入北市河溪小水曲下有泉穴水極清澈取以釀酒最清冽潯酒因以得名

按此河明時始開通而冒潯溪之名實非古潯

溪也

姚景熹夜過潯溪河晚晴秋已暮積雨漲溪痕雲淨江天遠烟凝草木昏暗蛩吟古墓寒月弔荒村四顧

無人跡淒淒欲斷魂

董懋昭早行溪上寒雲曉日尚蒙籠疎樹遙村淡似
空忽悟西風夜來緊枯萍盡聚板橋東

張樹培潯溪河潯溪溪畔徧桑麻溪上人家傍水涯
釀得黃柑霜後酒晚風輕颺一帘斜

彩虹橋港 北市河西岸第三支港亦稱北潯溪河分福

積港水北流入彩虹橋轉東至竹篠匯入北市河

北市西隅

諸水流注市河者至此盡矣

十字港 在中市通津橋西清風橋南明月橋北運河與
南北二市河交午相貫處

曹仁虎潯溪竹枝詞港汊縱橫盡水鄉菱歌隱隱起
迴塘清風明月何曾改依舊雙虹跨水長

董載昌潯溪竹枝詞市樓燈火映波紅十字中分處
處通一水盈盈不得語郎家明月妾清風

南十字港 在南柵便民橋北東西兩交界壩橋之間城
壕西來司前港東出與市河交午相貫處

北十字港 在北柵柵椿橋北蓮界橋西西木行港西來
百間樓港東出與市河交午相貫處

蓮溪 在東柵薛家漾東俗名荷花池頭

董懋昭蓮溪吟稿序節錄溪方可二畝許中多蓮故以

蓮名之溪上大宅先王父芝筠先生故居也王父退
老此溪之上憶自垂髫上學每晨隨諸兄後詣王父
書室則咸屏息徐步雁行立拱揖而退不敢妄出一
語昭冠偶墮地王父亦莞爾而笑不之責也迄今二
十餘年來課諸弟姝于溪側則吾家已日就衰落不
復昔時景象溪北故有槐二株今僅存其一兩岸垂
柳成行今亦變爲桑畦菜圃矣

董友松蓮溪夜步蓮溪風月夜夜靜石堂清月照溪
生影風迴蓮有聲香沈忘鶴夢蛩怨冷罍更烟霧青
冥處蕭然碧玉京

董熄過蓮溪有感示舍弟鑑平繡原五柳先生早決
幾人亡剩有柳依依稚孫曾奉掀髯笑揖罷私懷退
筆歸○衣得新荷牽伴侶籠他蟋蟀鬪輸贏溪邊長
憶兒嬉事三十年來半死生

又過蓮溪追憶鑑平圓荷碧一池小樓踞其上昔君
來授經安貧任疎放余亦時時過澄懷對新漲人靜
魚不驚風清柳輕颺每指釣遊地兒嬉非一狀荏苒
三十年爲師各顏抗吾衰早積唐而才與齒壯方當
絕塵奔秋駕不可量何意偶西征存沒頓悲愴化鶴
不復歸援琴怨孤唱行跡綠苔間獨尋何所向

輦恂潯溪棹歌不村不郭占清幽水閣窗開面碧流
吹得薰風纔幾日白荷花放滿池頭

瑤溪 在北柵外姚田

吳山秀瑤溪八詠環水茫無際渾疑一島孤祇憑雲
作岸絕少路通衢辛苦營巢燕飄零逐浪鳧心安隨
處好鹿豕盡吾徒。荒墟唯鳥集窮巷少人行隔岸
雙橋跨虛舟一渡橫女編蘆代織農種水爲耕難得
村醪熟常時醉不成。北尋雙塔寺南望兩河橋宿
雨片帆重平波三里遙秋淤穿荻筍春漲沒菱苗囊
笠吾方辦不辭漁父邀。千帆來北渚一鏡宛西湖

量水分菱茨開門放鴨雛盤餐魚市集烟雨米家圖
合有(元)真隱棲遲興不孤。亭前誰載酒橋畔自提
壺屋北雙峯翠牆東半畝蔬與花分主客聚石當生
徒永日消書卷真成槁據梧。斷港孤村僻通波十
里周蘆中人在水岸上屋牽舟霜月哀鴻雁沙汀狎
鷺鷥雙扉終歲掩蹤跡絕羊求。叢祠簫鼓沸傀儡
舞偏工南菴時演木偶戲以酬神時聽迎神曲難回佞佛風陳牲
集漁父散社醉村農利市邀三倍空嗟吾道窮。不
成行列樹自落子開花草辨君臣藥藤延子母瓜瓦
盆長貯酒蔬譜足傳家五日花豬肉臨溪喚小艇

石澥 在南柵以北岸有眠牛石得名一名曲港一名曲

江一名九曲里

董蠡舟潯溪棹歌一棹延緣石澥過華園秋晚起菱

歌遠偏廬圯生綃斷古木叢篁畫意多石澥菱歌爲十景之一

董恂潯溪棹歌石澥灣灣九曲環村娃打槳采菱還

清歌唱到斜陽暮秋老漁汀鷺激間南潯十景有曲江菱歌

划船漾 在南柵外三里簡五塘東烏程震澤東西交界

稽五漾 在北柵外震澤縣界一作居吳漾一作軍吳漾

一作金魚漾一作雞魚漾荻塘以北諸漾稽五最大或按

以軍吳之名指爲吳王屯兵處無據蓋在稽五圩之北故名漾地屬震澤而與烏程接界漾南之稽五圩屬烏

程又爲博鎮諸水
下流故仍載入

明董說軍吳漾秋漾荒荒白軍吳事杳茫詩緣隨窄
艇風信委枯桑泥塔雙橋串驚濤破寺當因之話黃
鶴樓勢等孤翔

釋正提泛軍吳漾一霎孤村烟裏過數圈嫩綠插靈
籤遠山雲迸離奇翠一幅瀟湘畫裏添。鵬勢拖開
雙燕尾鴨頭撐出蓼花汀長天皎潔無渣滓秋水相
連別樣青

紀官雪後舟行軍吳漾何須更築望山臺縹緲羣峯
盡載來漾口幾枝無葉樹村梢一角欲開梅莊巖野

寺俱瓔珞珍重寒爐撥冷灰放鴨船邊冰未解竹篙
攔陣忽然回

紀端軍吳漾扁舟湖上憶鳴夷折戟苔槍遠莫追堪
笑吳儂真短淺爭看畫舫載西施

董渭十七夜軍吳漾泛月寄文若中秋把酒書樓上
今宵又泛軍吳漾一葉舟從鏡面行絕勝醉卧梅花
帳人生到處類飛鴻雪泥爪記常飄蕩漁燈閃閃遠
岸明蘆花片片秋空颺恍如萬頃碧玻璃水色天光
兩清亮前途極目杳難窮自在中流頗蕭放扣舷揮
槳歌滄浪聲散淒風隨野曠夜來露重浴蟾蜍天公

元三
眸子無纖障此時安得謝元暉彎跼篷底相酬唱
董載昌潯溪竹枝詞居吳漾畔徧菰蘆蟹斲漁標不
納租此去太湖無十里眾船聘得陸家姑

董蠡舟潯溪棹歌北匯秋深蘆絮殘星星蟹火照波
寒居吳漾口移舟宿十輩尖團供晚餐

拜三漾 在北柵外三里古漚港東俗名湖基漾

薛家漾 在東柵司前港西來皇御河北出東接蓮溪南
通墨溪十字交匯下有泉穴水極清深亦稱雪漾

木瓜漾 在南柵嘉應廟前

徐家漾 在南柵白鵝兜南

蔡蕩

在南柵外二里簡五塘西一名草蕩漾

按鎮東北有蔡家蕩

屬震澤界
與此別

明董份夏日與諸君避暑蔡蕩漫擬當年河朔遊偶
攜佳客放扁舟天高月上夜如晝水闊風多暑欲秋
簫管拂雲來別墅酣歌達曙傍中流若知世外須臾
樂肯羨人間萬戶侯

明董嗣成紀子達子修昆仲夏夜相邀蔡宕玩月醉
後放歌青松軒下微雨收清風六月涼如秋明月斜
銜碧雲裏赤日半落西山頭主人不辭酒百斛清宵
擬作乘槎遊乘槎蕩槩出村口小溪夾道垂楊柳侍

兒初返採蓮船玉腕纖纖進新藕擊楫行歌出畫橋
紫簫曲曲度蘭皋蒹葭風靜湖光白星文不動青天
高青天倒映湖光裏鮫人龍女聲嘈嘈散髮一呼數
斗盡河朔空復稱英豪千年劉阮已寂寞卽今此樂
輸吾曹尊中已空不足恣酣暢又有輕舸送新釀中
流宛轉夜未央狂來大嘯踏高浪相逢總是高陽徒
此時不飲何爲乎青春一去不相待富貴可得常在
無浮生碌碌竟何事雙鬢辭我先荆枯飲君酒爲君
壽惟願清風明月對金尊與我相隨同白首醉眠不
知天地復何處但見星辰厯亂在我手

董蠡舟潯溪棹歌老漁吹火水中坻西莊村邊晚飯

炊瑤瑤四垂天澹沲雨晴蔡蕩放鸕鷀

明余津潯溪漁唱詩蔡蕩

天孤碧四垂雨晴正好放鸕鷀

黃家蕩 在南柵師古橋南

白果潭 在西柵朱家墳前

仙液潭 在西柵紀氏秀水墳前亦名半月池潭底有三

泉涌出如品字每歲十月朔鯉魚集此里人網取頗多

夢華潭 在南柵本名秤錘潭亦作寸池潭明董說居此

改名

按舊志皆作硯池云相傳梁昭明太子讀書處附會無據

明董說行藥夢華潭口吟立西南角潭秋雲亂生浦

思前夜釣樹露別村晴記補竹籬缺私拈客句評醉
漁歌正好再轉後溪行

又夢華潭卽事用非翁疎字韻白豆花陰藥杵疎閑
忙爲曝舊藏書浮名徒益九重障草木曾參七不如
秋園縛帚難供埽石壁纏藤合受梳擬鑿小溪通釣
艇從教野史補河渠

又夢華潭謠

鴈鵠生負而嗜書一日遇南宋舊本紙墨旣繁還書長慟故託爲書賈愁望之

聲夢華潭口石齒齒枯柳身欲拜秋水夢華潭泊鸞
書舟客望殘陽立柁樓立柁樓見書屋菊籬中人抱

書哭

方能潯溪竹枝詞一泓淨綠水拖藍牛飲荒汀百不堪莫借昭明誇硯沼祇今但曉秤鍾潭

董載昌潯溪竹枝詞陌上花開三月三相邀女伴寸池潭踏青無數匆匆去明日清明欲養蠶

范鍇潯溪紀事詩夢華潭口晚風吹一抹殘陽柳影欹舊事嘉隆傳韻語恍聞閒話水天時

豐草庵集有夢華潭口聽

客話嘉隆間大內舊事詩十首

夢石樓潭 在補船村豐草庵旁董說嘗夢登石樓故名

捨身潭 在南柵嘉應廟前

按今漸湮塞舊傳崔李二承事自沈此潭乃里俗謬說

倉潭 在東柵明董氏所開以泊租船

西林潭 在西柵西林古剎後

范莊池 在馬家港范莊水甚清大旱不涸

湧幢小品云廣十畝按今

池分爲二較小于前矣

曹仁虎潯溪竹枝詞范莊小沼碧粼粼卜宅當年種
翠筠可惜五湖輕泛去不曾同住浣紗人

董恂潯溪棹歌滿沼荷花映日紅范莊池上坐荷風

阿儂只愛池中藕多與西施臂樣同

南潯十景有范莊蓮沼

鳳凰池 在西柵紀家壩港西北池盡處有二泉旁出

明華士嶠李振業移家南林鳳凰池春日過訪賦贈
小築菟裘隔市喧閒雲擁戶日高眠短牆風折梅枝

瘦曲徑春深筍稚鮮濁酒儘拌詩似白空亭堪寄草
成元修篁應自來樓鳳紫氣遙占豈惘然

放生池 一在極樂菴一在東藏寺南今並無攷一在長
生寺前亦名長生池亦名挂瓢池俗稱魚池涇荷花頗
盛一在報國寺前亦名南林池或云卽鎮學泮池也

董漢策放生社冊序錄節家倩沈子子兼集同志爲放
生社蓋欲與飛潛同保此生也

又放生弁言錄節此翁禪師與家江屏聞仙輩結放生
社潯水淪漣飛柁上下吹沫鼓翼極乎霄淵

明董斯張張泰氏於報國倡放生社欣然有賦入界

曠求我迎照謫不殊元黃自相血靡哲而弗愚居士
平等慈齋心澄物初風澤無二觀心腎爲江湖文波
停晝梵鱗者還其居解斯蕩析懸至仁消响濡中林
懸日規萍藻相與舒飛沈在天地往來於一如浩焉
川上機樂我了非魚

董漢策極樂菴放生解網開籠今日鷺雲痕月路望
中微碧天極目升沈趣漠漠長烟鳥自飛。微波澹
澹行花新澤國初占魚樂春傳說江淮多草食唬號
還有路傍人

董耒塔院放生社詩爲此山和尚賦品物同天賦淒

然各性情莫將鮫室淚滴向藕花城
蜃氣連雲黑蝦
瞳翳水明濠梁圓舊社願借遠公名
○澤國新波及
江天夜雨深冷他調鼎手閒殺羨魚心
蘋尾離塗炭
修簪切梵音猶將枯肆泣彈入伯牙琴

〔丁蟾〕長生池觀白蓮數弓池匝梵宮寬
玉蕊香浮露
未乾淨土一般朝涌出霓裳萬隊夜清寒
花容倒暈
長空空水色澄心止觀觀小住渾忘炎暑
逼閒鷗時
掠水晶盤

〔張鎮〕潯溪漁唱菴遺豐草夕陽斜一曲溪橋楊柳遮
若箇幽情忘未得挂瓢池畔看蓮花

愛蓮池

在大宗伯第內西有小兜通後河

義井

在南柵嘉應廟大殿前明隆慶三年重開

眞武井

在北柵善寂菴內亦名七星井

張模潯北七星井記

節錄

余家潯之北其地舊名井臨

頭亦作井陵頭西北數武有廟數楹額曰北聖庭西

檐下有井一闌鐫八字曰坎水制火永息烽烟旁鐫

小字三行曰乾隆五十捌年吉旦信官溫雲臯重開

井泉住持南蓮建其背更鐫坎水八字較前差小訪

之故老曰此處舊有井七焉曰七星井皆不出數十

武外今多湮塞莫能指其處惟此井獨存而重浚時

曾植七星旗一桿於井上以存其遺復訪餘井處有
言廟牆外西去數武昔有一井約略可辨而余家後
屋曾聞跨井而建則又爲二井其餘四井數年來屢
求不得其處余因歎舊蹟之不彰紀載闕如年代莫
考而重開茲井者又未詳溯其顛末因謹記之

木瓜泉 在南柵木瓜漾西毛家橋北境岸址有泉旁出
一線泉 在西柵妙境庵兜底水涸時土窟中有泉流出
涓滴不絕水漲則隱一名竹雪泉

張鎮潯溪漁唱纔過詩橋妙境菴祇園鐵佛舊曾詣
泉飛竹雪清如許活火煎來活水甘

蠶舟潯溪棹歌太傅祠堂枕碧川春波清淺僅通
船船屑炊火烹新茗得涓流一線泉

水利

附

談鑰吳興志郡地最低性尤沮洳特宜水稻又田疇必築
塘防水乃有西成之望潯則以車出水旱則別入水今
郡境東南鄉分延袤百里田舊有圍塍岸歲修崇固悉
爲上腴畝直一金舊諺云諸郡旱我有岸諸郡熟我無
穀今不然也。太湖舊有沿湖之隄多爲漶漶有斗門
制以巨木甚固門各有牖板旱則閉之以防溪水之走
泄有東北風亦閉之以防湖水之暴漲爲利浩溥後漸

堙廢頗爲郡害

徐獻忠吳興掌故集湖州運河東達平望幾一百二十里

太湖之水半泄其間

按此以運河爲太湖下流誤

自運河以南諸溪

港經泄之處爲民間所占日漸狹小而上源諸漾積受

洪流之處漸至填塞爲蘆埂圈築爲藕蕩者又不知其

幾也是可不爲厲禁以防閑閉之患哉。元周文英三

吳水利云蘇湖常秀之田高下不等大率低田十有其

七高田十有其三吳越錢氏之在東南專享此利蘇州

有營田軍四部共七八千人又有撩淺夫專爲田事導

河築堤以減水患於是歲熟錢五十文糴米一石。元

潘應武言浙西道自歸附官慮哨船入境擄掠鄉村將河港釘斷亦有築爲壩者所以水流不疾不能滌去淤塞。忠按成化九年添設蘇松常嘉湖五府勸農通判所屬縣縣丞各一員近復革去今世冗官理應裁省者甚衆惟勸農官獨不可少所謂勸者專管水利以興農功者也蘇松在震澤下流淤澱日甚吳淞江已爲平陸而稅額日重加派不息吳興居於上流其入太湖之水旣爲吳江所遏壅則其南向之流所係亦甚重而圈爲菱藕之蕩塞爲桑麻之區日益加多苟無專官治之其誰已哉

董斯張吳興備志方道通判平江府嘗論太湖高于運河
常疏雪川浦漉之要者庶無飢歲後湖府得其說爲之
果有功焉

樓鑰攻媿集

○嚴訥論水利圩圖今天下以墾田

當司農鉅供者蘇松爲最蘇松介在湖海厥土塗泥利
害以水圩岸者所以堤水而田卽周禮稻人匠人所掌
塗防者也田甚下濕岸則陡立如城河循其外而中田
焉禾在田雖芄芃起矣而河流猶出其上舟行者蓋俯
而窺焉岸或咫尺隙莫禦而田且沛澤矣其田之最高阜
去水遠而水不及溉者則終古爲鹵田在上下壤之間
土厚而水深則號膏腴以其得水蓄洩可爲旱澇備而

所爲能蓄洩者以有圩岸耳歲苦旱則河之水續枯棊而上以入于田河不龜坼田不乏溉歲苦潦則岸水出于河而岸障之雖勞人力不盡待命于天自三江道湮疏濬失宜恆雨注積而無從尾閭也水襲于岸寸許而膏腴汨爲巨浸不能與下濕者論良瘠矣且圩岸之有無其利害彰彰也農民櫛沐蘼蕪罄室竭力于田而婦子懸命焉甯束手于一朝之患號呼奔走其傍痛莫之救而獨不爲先事之備余怪而究其說矣每圩田畝姑以千計田其中者姑以百計百家之中有十不協力而九十家者修築之無益也農雖值有年僅給俯仰困于

勞而轉徙者眾矣宜未暇爲圩岸計岸土取于田岸寬

則田窄小民愚不察其損小而利大也續文獻通攷按此無

預湖事然治水者以湖治湖不若以三吳治湖也此則

論圩出極詳張故備載之按水鄉多低田故其害滂甚于旱而其利亦泄亟于濬以

宣下疏固圩岸爲要務湖與蘇無異也董氏備載此論旨哉試以所聞所見者論之嘉慶九年之水大矣道光

三年尤大而二十九年又大于三年豈非河身日淺圩岸日低之明驗歟

朱國禎湧幢小品隄之功莫利于下鄉之田余家湖邊看

來洪荒時一派都是蘆葦之灘却天地氣機節宣有深

有淺有斷有續中間條理原自井井明農者因勢利道

大者隄小者塘界以埂分爲勝久之皆成沃壤今吳江

人往往用此法力耕以致富厚余目所經見二十里內有起白手致萬金者兩家此水利築隄所以當講也

鄭元慶石柱記箋釋環湖之水悉注于太湖微太湖民其

魚乎所謂導水以疾趨太湖者水之道也決之而已矣

議者謂木簾魚簾皆礙之類皆能壅水亦一說也至于決太湖之水以放于海

其事固在蘇松張鐸府志○按三吳之水利在下流而吾湖

之水利在溇港自宋迄元代有治績永樂以後自監司

以及郡縣俱設有水利官專治農事每圩編立塘長卽

其有田者充之歲以農隙官率塘長循行阡陌問督其

築修圩塍開治水道水旱之歲責其啟閉溝缺時其守

護而檢報災數焉迨至中葉農政不修水利官漸次裁去所謂塘長者徒以勾攝公事起滅詞訟而已遑問其爲水利哉近年沈樂存侍御上疏請開太湖下流并濬港章下所司勘覆不行因作東南水利編大指以爲湖水爲患要在疏橋口以出江濬江以達海而湖州所屬各濬港築隄置閘以捍風濤亦與疏濬相表裏要言不煩可當石畫也

張鴻窩南潯文獻志潯鎮西來之水由湖州府城定安門合迎春門沿東塘而至南來之水由烏鎮而下其源皆發天目按縣志南條之水發源天目之陽西條之水發

源天目之陰南自定安門而入曰雪西自清源門而入

曰茗合于江渚匯總名雪溪其巨流出臨湖門支流出

迎春門雪溪之水出迎春門

按沈登瀛備志云郡中之水自西來者曰茗溪入清

源門至於江渚匯自南來者曰前溪曰餘不溪曰北流水三水會于峴山漾入定安門至于江渚匯然後謂之雪溪今人誤以打柴灣爲倒雪灣謂雪水自西來至于茗溪發源廣以闢水橋爲雪水橋謂雪水自西來至于茗溪發源廣茗山在天目山之陰今人附會茗水自南來創爲南茗之名殊不知山海經浮玉之山茗水出於其陰未嘗言出於其陽也其支流至塘北分注各澗港其巨流東過潯溪

入吳江之鸞脰湖東南入嘉興秀水桐鄉諸邑烏戌志

鎮水發源天目山之險潭厯茗雪二溪自涵山東流其

在西柵者一股出通湖橋而北達南潯總之潯鎮諸水

其來也西南皆以茗爲源其去也東以鶯脰湖爲委北

以太湖爲壑

按此畧本薛溪文獻文獻又云雪自在湖

雪也今攷涵山之水固與雪無涉且烏鎮來水至穿珠灣卽折而東流實不至滄烏戍志誠誤也後人誤會文獻之意并謂雪水不至焉豈

運河中亦無雪水平大謬

胡承謀湖州府志湖之東塘往來要途河直而狹洪水驟

漲數至踰岸築之宜高然無波濤衝激故邊可石中可

泥闊亦丈許可也

丁元薦湖塘遺議

○據烏程縣詳稱太湖爲

湖郡下流茗雪諸水俱以湖爲匯歸其上流水之濶港不無壅塞一遇黃霽陰雨山水旁溢自應少爲疏濬若必開濬深廣恐遇旱則太洩而車戽無從遇澇又恐

湖水泛漲而疆理可危誠不若略爲疏通順自然以備蓄洩倘入海入江之下流毫無阻滯則湖水不致泛漲而湖郡無水患矣

范承勳覆開太湖疏○按此論蓋不知溇港各有牐板以時啟閉乃轉以

深通爲慮又諉諸下流夫下流宜通而溇港則不可深廣此何理歟如其所言是溇港之設有害而無利矣不

亦傾乎

羅懋烏程縣志自東關外至平望官塘苕霅諸水皆歸于塘北進溇瀆而至太湖其塘橋內支河現在通行而淤淺者十之五六向因兵燹盜賊築塞不通者十之三四卽宜早爲疏濬毋使附近豪猾分踞網罟東塘之水港不通卽有溇瀆難洩

童國泰水利條議

董世綸烏青鎮志昔吳越天寶八年置都水營田使以主

水事募卒爲部號曰撩淺軍談水利于今茲撩淺誠爲
急務但恐奉行不力有名無實則徒費錢刀耳蓋募夫
供役取辦于富戶部夫督役責成于有司二者皆非所
樂必致阻撓而後已張履祥云耕者各浚其田之際其
不耕者田主給其食佃戶出其力惟閒曠之所乃用衆
力在經濟經在支濟支有司警其頑惰自私梗令異議
者分界刻期以鳩羣作不及一二月在在皆通矣見張楊園集
○置水柵所以備寇盜也鎮四隅設柵立法非不盡
善然承平日久怠玩相循所稱建柵局閑者不審地勢

之要害僅于市梢橫一短木雖有鎖鏈都不堅緻歲久聽其木朽腐而並不更易宵深而閉未旦而啟猝爾有警詎堪防禦況港汊旣雜逐路可遁不必盡由柵也卽扼要之處有橫木以拒之而乘更闌守望之疎亦不難毀而入耳昔者禾郡太僕李實君有言曰置柵當于離鎮半里許查有小水接連大水緊切去處兩邊密釘椿木四五層中作水門一通船出入鎖鏈務須堅鉅點附近殷實之人編定工食從厚給與于柵之左右地面構屋數椽令彼棲守仍于各柵口安置橫木以時啓閉此後卽有綠林竊發能斬柵而入乎縱使得入看守者力

不能敵亦可從陸路抄至第二層內柵邊呼集居民助其聲援則以眾禦寡兼之入而難出勢卽成擒所謂重門之險也柵成于冬月水涸時逐一看驗損壞者輒行修補則民無探丸之恐官免捕緝之勞太僕雖爲嘉郡言之而變通宜民實有規異勢而同形者仿而行之未始非守土之良謨也。盜賊往來利于捷捷莫捷于撻船蓋撻船用槳而不用櫓一船僅容兩櫓用槳則一葉之艇槳愈多則愈速且手持一槳便于回旋卽可當器械以拒追捕之人其害不可勝言予承乏茲土洞悉其弊條議陳于監司一切撻船概從禁止船廠不得製造

其現在者改短船身用槳者易而用櫓則已成之舟不致宿于無用而草竊奸宄之徒亦不能借乘流之便捷而恣行梟張爾

沈彤震澤縣志熙甯三年郝亶上言古人治低田之法或五里七里而爲一縱浦又七里十里而爲一橫塘因塘浦之上以爲隄岸使塘浦闊深則水流通而不能爲田之害隄岸高厚則田自固而水可必趨于江非專爲闊其塘以決積水也○隆興六年李給獻治田三議曰敦本之法要在治田若但知決而不知治田則所開浚之地不過積土於兩岸之側霖雨蕩滌復入蕩浦不五

七年填塞如舊前功盡棄矣。○宏治中史鑑議築隄常
於春初編集民夫每圩先築樣墩一爲式高廣各若干
尺然後築隄如之其取土皆於附近之田又必督民以
杵堅築務令牢固隄旣訖工令民甯泥填灌取土之田
必使充滿復於隄之內外增廣其基名爲抵水蓋隄旣
高峻無基以培之則歲久必頽矣

金友理太湖備攷周永年水利書論水于江北則利在漕
論水于江南則利在田欲求水之利先審水之害害在
淤塞則利在疏通害在泛溢則利在停泓而泛溢之病
又根於淤塞其要不出蓄洩二字故歲修之計無如深

其浜濶高其岸塍如治田之法治水深者益深則流疾而不至上涌高者益高則防峻而不受潰入。震澤縣志水之爲物惟下之趨惟隙之乘諸濶大通則水從諸濶入湖諸濶半通則半從諸濶入湖半從荻塘爛溪等處四散東注從汾湖三泖白蚬江而歸於黃浦按今日之水勢如太湖之水略小耳未必諸濶淤而湖杭諸郡邑必遭此沈溺然諸濶之淤不可不開也此不必責之官而責之民亦不在一時而在平時責之民則惟其所便田可溉而舟可行無餘事矣在平時則歲歲可修濬則置之旱則開之勤日則置之暇日則開之功無已時利無盡日

矣。自大錢以東諸淩港之上流皆從荻塘來荻塘之水初不直下淩港距淩港四五里或二三里又有橫河一道自西而東屈曲以貫淩港之端上承荻塘諸橋港北下之水分入諸淩港以下太湖。震澤縣諸港上流皆自烏程縣界來其在荻塘之北由湯淩等涇來者入境爲泔溪爲南渡船港爲豆腐港東瀦爲虞家漾白田漾西漾又爲蔡家蕩其由荻塘九里六里等橋來者入境爲夜字港雨字港北瀦爲唐蒙漾東爲蔣家漾斜尖漾其由南潯荻塘三里北渭二橋來者入境爲古淩港瀦爲稽五漾以上諸水散入薛埠諸港下太湖其東出

三
一支爲橫草路最深闊。凡湖州東境杭州北境之水之歸太湖者無不經荻塘而北下蓋眾水之樞紐湖口之綱領也荻塘以北之水爲漾爲蕩支派紛錯及歸於橫草路又合諸水而爲一欲確指某水從某港下太湖條分而縷析之雖土著亦不能辨

王鳳生浙西水利備攷湖州百川叢錯而要以苕霅二溪爲總貫全憑北面淩港歸太湖以爲蓄洩又支分而東由南潯之東塘烏鎮之瀾溪而出平望鶯脰湖故九霞山長云吳興之水不患其源之不通而患其流之不洩凡蘇松興利之處卽吳興去害之由斯言可謂扼要矣

○烏程之水由東塘抵南潯出平望又自東塘支分而注于北塘由北塘屈曲而趨于各澮港歸太湖南潯西柵東柵出水則瀉于北匯橋陸家漾金魚漾自此盤旋而北或縱或橫分注各澮港以歸太湖。總核大勢烏程西南二方爲七邑下流之藪惟賴北有太湖以爲蓄洩東由運河而注鶯脰湖東南由澗溪潯水分瀉于秀水震澤故童國泰水利條議云譬諸人身湖郡咽喉也太湖腸胃也入湖諸港壅阻旣多如咽喉抑塞不通則腸胃四肢均受其害若水來西南沙阻東北勢將泛濫橫行旁溢四境爲害可勝言哉

范鍇潯溪紀事詩注明世宗實錄嘉靖十八年九月丁巳添設浙江湖州府通判一員于烏鎮駐劄主緝捕盜賊兼管治農水利。鄭準開國集宋慶元間袁說友言浙中陂塘漑瀆悉爲田疇水則無地可漑旱則無水可厚不嚴禁之無復稔歲然則淤水爲田利少害多可見矣。○茅氏曰熙寧七年興修兩浙水利議者謂苕霅二水出于天目之山而溢于太湖書曰三江旣入震澤底定今二江並廢獨一松江入海故太湖之水壅而吳興被患遂欲廢北關長安二埭上塘之渠與下塘相通又于餘杭之南湖引苕溪之水達于漕渠穿錢塘之市而入

于江以紓吳興之患時多以爲然部使者檄餘杭主簿
葛書舉行視書舉以爲吳興之水歸于太湖太湖廣袤
四萬八千餘頃旁占數郡其所灌輸非獨苕霅也書稱
三江震澤說者不同就如議者之言則尋常溝瀆之流
豈可以比二江之任祇益紛擾耳且錢塘二埭其來久
矣大役之興古人所重固執不可議者不能奪其事遂
寢故龍圖閣直學士李公常時守吳興聞書舉之說貽
書嘉歎部使者亦交薦之今吳之諺曰攤了長安壩沒
了吳江港見上港之必不可通下渠也萬曆戊申餘杭
南湖堰壞蘇湖俱成大浸撫軍移湖守陳幼學兼治之

而定若非葛主簿則湖久爲浸矣

按此條可爲妄言妄作之鑒昔宋郝亶郊

僑父子言三吳水利極詳而沈氏震澤縣志舉其說而條辨之以爲後鑒亦此意也

○萬言曰崇

禎元年蔡懋德疏言三吳水利之不興已數十年吳淞江入海故道化爲平陸矣白茅七浦鹽鐵等洩水大川僅存一綫矣止劉家河尚通而泥沙漸淤亦非故迹所以一遇淫霖太湖西來數郡山水奔注蘇松下流無從宣洩數百萬頃良田悉成巨浸夫臣鄉雖居一區財賦半天下況今邊警需餉仰給東南尤爲至急至切及今不治患日甚一日災祲易乘蠲賑難望小民皮毛俱盡猝有他虞卽國賦將安所從出耶

張丹山潯錄三吳澤國外鄰江海內迫太湖故吾鄉之旱
潦半視震澤之通塞以爲準南潯北距太湖二十里而
近固宜究心水利已故湖州府通判衙門駐劄南潯亦
稱鹽漕水利然則運河之淺深漚港之蓄洩是其專責
嘗攷明周文襄忱守蘇時常講圍田築塘立閘旱潦啓
閉之法而談鑰吳興志已早言之余少時聞故老傳說
直北諸圩皆有夾塘今人皆怠惰廢弛不復修整一遇
旱潦倉皇救率皆不及此大病也愚意以爲今夾塘
之有根腳者於春間或水淺時先令鄉人放蘆傍種楊
樹俟其長大繁茂漸灌以土年年帮補久久築實不數

年而成隄矣

按張氏爲此說以築隄取土不易也每見旱年各鄉開濬河港所出之土多患無堆

積處若卽用以築隄斯真兩得之計矣

隄成之後視其圩岸之淺薄

角之孤單者兩面增築水潦時固藉以堵塞而漸積漸

闊樹以桑枝其利亦溥

按或疑隄多則容水之處少恐有礙于蓄洩不知濬河以培隄

隄日闊河亦日深不患其無所容也

再圩之四圍得此藩籬於其進出之

口施以水柵設以閘板旱潦藉以無虞村落因之保守

最爲吾鄉水利要務官斯土者每於冬末春初時出巡

行相其高低察其勤惰量爲獎誘亦未始非古人勸農

遺意至于立閘之法大約高者大者仿長興孝豐之制

用石尤堅固耐久低者小者仿太湖淞港之例用木而

其立閘之費則照旧起派費之田主一切放蘆種樹填泥帮岸之事責諸佃戶立有成規垂諸永久洵平官民並利惠澤無窮矣

施國祁志感攘熙曾記旦朝同晏市驚遲日過中寬

渡晨裝殊綏綏還家夜擔更匆匆太湖樓工久圯濁泥塞港水涸時不能行舟淺處且不通汲諸樓航人泊舟漾口以待入市者每望晨負擔而出迂道至步下船遠或四五里

是以爲市日晏歸棹率在昏夜又必轉見愁濩塞津

搬什物燃炬尋路至家農民甚苦之

搬苦況忍齋荒水利空宋胡安定先生蒞湖學時曾設水利齋得似肯

庵賢太守李公重尋二十七常功案二十七樓名豐登稔熟康安樂

瑞慶福禧和裕阜通惠澤吉利泰興富足固益濟皆冠以常字見石柱記箋引湖漣記

沈垚七古一章用愈愚韻贈家柳橋雨多川溢水相
觸防患誰先改突曲兩淮荆湖災較重饑民形面皆
鳩鵲錦江杭稻足支移千里雲帆轉夔蜀吾鄉地下
北濱湖甯來茗水源天目運道所資有荻塘衝處蒨
石捷以竹近日棚民墾山地泥鬆和雨下山腹填塞
溝渠患非細人尤凶悍性不淑湖州以西一帶山近
皆棚民墾種尤多植
包穀一孝豐人云山多石體石上浮土甚淺包穀最
耗地力根入土深使土不固上鬆遇雨則泥沙隨雨
而下種包穀三年則石骨盡露山頭無復有土矣山
地無土則不能蓄水泥隨而下溝渠皆滿水去泥留
港底填高五月間梅雨大至山頭則一瀉靡遺卑下
之鄉汎濫成災爲患殊不細山地價值不多棚民多
溫處流人初至時以重金啗土人賃墾山地賃之錢
倍於買值以三年爲期土人不知其情往往貪其利

三年期滿棚民又賃墾別山而故所墾處皆石田不
毛矣流人之來益衆則棚益廣西接[○]國北至江[○]
南且由徽州縣延至江西福建凡山徑險惡之處土
人不能上下者皆棚民占居性凶悍強墾人士或掠
人婦女畜產土人不敢校官吏不敢詰

下流況又太湖淤菱蘆彌望包

山足

洞庭山東南湖面近皆成菱蕩舊時山離南岸
二十餘里或三十里今則自菱蕩盡處至南岸

陬處纔四五里湖而淺狹水無所容害將不可勝言
舊時言水利者皆以濬闢吳淞江爲要今則當以闢
菱蕩爲第一義蓋菱蕩不闢吳淞雖濬無益也

山源不蓄湖復淺汎濫將如

癰潰肉水盛齧塘橋久圯阻斷行途嗟部屋烏程縣

令議修塘淫流奔放防溪谷斂錢富民事豈易司役

惟君見免俗君本儒者治見聞冥心水利搜曾獨勸

君努力重下帷膏澤他年霑草木

按水利之言繁不勝錄今卽舊志并府縣志及鄰近諸志各摘數條不復泛引雖俱有關於一鎮而不能專屬一鎮故附河渠之後要之論水利于吾鄉可一言以蔽之曰以治田之法治水而已雖然昔人有言水利興而水害益烈是又後之論水利者所當深長思也

補遺

周家漾 在北柵外後築爲臥塔

蘆蕩 在鰲里西南

長池 在東柵外分鄉堦側